

Mncir du kuu bkwàa

¹ “A mncir ce à be fa nè bée Isrèl nà:

² “À ka' yuu ŋkwàa ce a ŋwè Hibrù, banε e be fà' bfè' ntuunfu, e ba mbe bfè' sàamba tε e fuu dù, là' yuu ka'. ³ Ka' ba enε e vù mimnji', banε e be fuu dù mimnji'. Geewa'a, ka' ba enε e vù a ŋgwa yì, banε ŋgwa be dù a ye. ⁴ Ka' ba enε yì masà à fa ye ŋgwa, e bi ye boo, kè boo mmbaŋrù è, kè boo bbyèŋge è, banε ŋgwa ba boo a be ba vi yì masà, tε e fuu dù mimnji'. ⁵ Geewa'a, ŋkwàa anà ka' laa enê, ‘Mè kòŋ yà masà ba ŋgwa wà ba boo wa. M be fuu efa bkwàa ka’’, ⁶ banε yì masà be vù nè ye kùntombi nè Nyù, vù nè ye kù kèŋ kè kù ncũundù' è, to' ye tù' nè nto tε e ba yi ŋkwàa nfesè.

⁷ “Ŋwè ka' fyeni muu yì ce muunje à ŋkwàa, banε e be lò fuu àmbò bkwàa ce boo mmbaŋrù a ke fuu nà ka'. ⁸ E ka' tε gèe yuu ce yi bòn yì masà ce e m yuu ye nà ka', yì masà ma'shi tε ŋwè mò' tee ye. Yì masà ker tur ŋger à rfyèni ye nè nfuu ka' njobè' a ye ce e bu' mŋkà'ni. ⁹ Ka' ba enε e yuu ye nè muu yì ce muu mbaŋrù à ŋgwa, banε e ghashi ye àmbò muu yì wa'a. ¹⁰ E ka' lor ŋgwa mò', e fa kani ŋgwa yì ntombi nà byee kè bcè' kè kani ye embe bkuu ka'. ¹¹ E ka' tε gèe buu btaar ca ka', banε e be fuu yi yu, là' mbàa ka'.

Mncir du kuu ŋgèe ntambaŋ

¹² “Ŋwè à ka' lip ŋwè, e kwê, banε a be yu ŋgàŋ. ¹³ Geewa'a, ka' ba enε e ba le' ye tε e bo yu ye ka', à ma'shì Nyù enε e gwe mbe yě bò, banε M be ce dì' mo' ce àde' ŋwè ce e yu ŋwè nà caŋ du suni fàdì' ce yi be ba yeeni. ¹⁴ Geewa'a, ŋwè ce e ka' ghoo ntaŋ, yu ŋwè, ku rîŋ, banε wèe be fur ye embe ya dī ntòò rfa tε a bo yu ye.

¹⁵ “Ŋwè ka' lip yì ta kè yì ma è, banε a be yu ŋgàŋ.

Ŋwà' Rfuu

¹⁶ “Ŋwè ka' yee ŋwè du fyenî, a ka' koo ŋwè àgho, banε a be yu ŋgàŋ.

¹⁷ “Ŋwè ka' cep yì ta kè yì ma è, banε a be yu ŋgàŋ.

¹⁸ “Bèe a ka' ce lapni, mò' lip mò' nè bo kè tuu ye nè lùr è, e kwe ka', nonj ba mbe bkuu, ¹⁹ banε a be ghashi ŋwè ce e ba lip ŋwè nà ka', ce ka' ba enε ŋwè anà à ker nati a too nyor nè mbàŋ, a ce karkar. Ku ba ba enε ŋwè ce e ba lip ye nà be là' yì nfè' ce e busi, ye enε ŋwè anà à kè'se bònboŋ lε.

²⁰ “Ŋwè ka' lip yi ŋkwàa ce mbanrùŋwè kè njeŋwè è nè co', e kwe mbe yě bò, banε a be kusi mncucu'. ²¹ Geewa'a, ŋkwàa anà yi ka' ke'se mbenjì nòŋtu' kè mbenjì mnòŋ bbaa è, banε a be kusi mncucu' ka' njobè' ŋkwàa anà yu yi mbàa.

²² “Bèe a ka' ce rè bkòr, cir njeŋwè ce e yu nè rbù, boo fùusè ye enjep rbù, geewa'a, a bæsi ye ka', banε ŋwè ce e cir ye nà be kù là' àmbò nduu njeŋwè anà be làa enε e la'. E be là' àmbò ŋgãa rsa' a teeni. ²³ Geewa'a, ka' ba enε a bæsi ye sê, banε a be là' ryòŋ nè ryòŋ, ²⁴ ŋwè ka' to ŋwè rlr, banε a be to li foŋ, ŋwè ka' co' ŋwè rsòŋ, banε a be co' li foŋ, ŋwè ka' tee ŋwè rkoo banε a be tee li foŋ, ŋwè ka' kep ŋwè kùu, banε a be kep yi foŋ, ²⁵ ŋwè ka' too ŋwè nè mor, banε a be tòo ye nè mor foŋ, ŋwè ka' fa ŋwè nfur, banε a be fa ye ye nfur foŋ, ŋwè ka' bæsi ŋwè banε a be bæsi ye foŋ.

²⁶ “Ŋwè ka' lip rlr ese yi ŋkwàa, kè yu mbanrùŋwè kè yu njeŋwè è, bepsi li, banε e be mà'shi te ŋkwàa anà du à là' njo li rlr anà. ²⁷ E ka' co' rsòŋ ese yi ŋkwàa ce yu mbanrùŋwè kè yu njeŋwè è, banε e be mà'shi te ŋkwàa anà yi du njo' li rsòŋ anà.

Mncir du kuu mnyàa

²⁸ “Mbòn ka' cir mbanrùŋwè kè njeŋwè è, e kwê, banε a be tuushi mbòn anà nè blùr te e kwe. Ŋwè be ye nyàa mbòn anà ka', geewa'a, a be koo ŋwè mbòn anà enε e la' ka'. ²⁹ Geewa'a, ka' ba enε mbòn anà à m ku ce

Ŋwà' Rfuu

cirshi bée, bée à bεε ŋwè mbòn, e ke' ghashi mbòn anà bònboŋ ka', e ka' yu mbanrùŋwè kè njeŋwè è, banε a be tũushi mbòn anà nè blùr, yu ŋwè mbòn foŋ. ³⁰ A ka' sor ene e la' là', banε e be là' ka' ke ce a ka' laa nè ye ene e la' te e bo tee li ryòn. ³¹ Mbòn anà ka' cir muu ŋwè ce a muu mbanrù kè muunje è, banε ncir anà yi be koo ŋwè mbòn. ³² Ka' ba ene mbòn anà à cir ŋkwàa ce a mbanrùŋwè kè a njeŋwè è, banè ŋwè mbòn be là' silvà mntaar nè masà yi ŋkwàa anà, te a tũushi mbòn anà nè blùr te e kwe.

Mncir du kuu yuu ce àde' à la' àtu yuu

³³ “Ŋwè ka' mɸ' cùu tuŋ le too kè tuŋ bè'tè cete ka' è, mbòn kè jàaki' è vɸ gwe njoo, ³⁴ banε ŋwè ce e tuŋ bè'tè anà be là' ntaa. E be là' mbàa nè ŋwè nyàa, dù nè gũu nyàa.

³⁵ Mbòn ŋwè ka' tɸu yi mò' e kwê, banε a be fyèni yi ce e cu ntée nà gáp mbàa efa gho, kèr gáp gũu nyàa foŋ yeeni yeeni. ³⁶ Geewa'a, a ka' riŋ ene mbòn anà e ke cirni, ŋwè mbòn à ke' le mbe ŋka' ka', banε e be là' mbòn anà nè mbòn mò', koo gũu nyàa.

Ŋwà' Rfuu

22

¹ “Ŋwè ka' yee mbòŋ, kè yee njèe è, sèe kè fyeni è, banε e tur à rlà' mbòŋ anà nè mmbòŋ tâ, là' njèe mò'sir anà nè njèe yi kyèe. ² A ka' koo nyèe àmbò e ce kep ndap, a lip ye e kwe, banε a be ghashi ŋwè ce e lip ye nà enε e gèe læe yi cee ka', ³ geewa'a, yi ka' koni ba mbe nfè' ce nyù à bàp wεε, banε a be ghashi ye enε e gèe læe yi cêe. Nyèe ku tur à rlà' yuu ce e yèe anà. E ka' te tur yuu ka' banε a be fyèni ye, là' àgho. ⁴ Ka' ba enε a ye nyàa ce e yèe nà nè ye e ku bii ntèe, kè a mbòŋ è, kè a jàakì è, kè a njèe è, e tur à rlà' ŋkàrà' baa.

⁵ Ŋwè ka' yeesi yi nyàa mbe ŋkù kè mbe ŋkù mnsini yì ŋwè mò', kè ma'shi yi nyàa yi jer àwàa du yeŋger mbe ŋkù ŋwè mò' è, banε ŋgàŋ tur à rlà' nè yuu embe yě ŋkù, kè yuu embe yi nsuu mnsini ce yi bòn se è .

⁶ Ŋwè ka' too mor yi tuusè du mbe nsuu ŋwè mò', too kur kwâa kè kwaa ce e ku bii mbekì è kè too ŋkù anà wεεwε è, banε ŋwè ce e ba cu' mor anà tur à rlà' buu anà wεεwε.

⁷ “Ŋwè ka' fa mbàa kè buu mò' è nè ŋwè a yě geŋ enε e kupshi non̄si nè ye, a ka' yee buu anà ese ŋwè anà, a ka' koo nyèe anà, banε nyèe be là' ŋkàrà' baa. ⁸ Geewa'a, a ka' te koo nyèe anà ka', banε ŋwè ndap tur à rtεe kùntombì nè ŋgãa rsa' à rdùŋshi enε e jòo yuu ŋwě a yě geŋ kè e jòo ka' læ. ⁹ Ŋwè a ŋwè a ka' ce kèrni mbendùu yuu, kè a mbòŋ è kè a jàakì è, kè a njèe è kè a cè' è, kè a njèe ke ce yi bu è, mò' ce làa enê, ‘Cena a ya yuu’, banε wowèe bsip a be vù nè wap mnsa' kùntombì nè ŋgãa rsa'. Ŋwè ce ŋgãa rsa' a ka' laa enε e gwè mnsa' banε e be là' yuu anà nè ŋwě a yě geŋ ŋkàrà' baa.

¹⁰ Ŋwè à ka' fa jàakì kè mbòŋ è, kè njèe è, kè njèe nyàa mò' è, nè ŋwě a yě geŋ enε e kupshi non̄si nè ye, yi ka' kwe kè yi læe è, kè ŋwè à koo ŋwè a ce ye ye ka' è, ¹¹ banε a be teni nsa' embe tar wowèe ba nè lè' ce e be ye kùntombì nè Yawè, te a bo ye enε e jòo yuu ŋwě a yě geŋ kè ka' læ. Ŋwè

Ŋwà' Rfuu

yuu anà tur à rbyemi lè' anà, tɛ ŋwè ce e ye lè' nà bo là' yuu ka'.

¹² Geewa'a, ka' ba enɛ a yɛɛ nyàa anà ese ŋwè ce a lè nɛ ye, banɛ e tur à rlà' nyàa anà nɛ ŋwè nyàa. ¹³ Ka' ba enɛ nyàa efa rɛŋ à koo a sasi à btete à btete, banɛ e be vù nɛ bjàjàp e fa gho àmbò ncòo, tɛ e ker là' nyàa ce nyàa efa rɛŋ a sàsi anà ka'.

¹⁴ Ŋwè à ka' foo nyàa ese ŋwè a yě geŋ, nyàa anà du lɛɛ kè kwe è, ce ŋwè nyàa yu àfo ka', banɛ ŋwè rfòo tur à rlà'. ¹⁵ Geewa'a, ka' ba enɛ ŋwè nyàa yu àfo, banɛ ŋwè rfòo be là' yuu ka'. Ka' ba enɛ e fòo nyàa anà wa'a a la' mbàa àtu mo, banɛ mbàa ce e là' nà yi ghɛɛte àtu mo.

Mncir kuu àmbò bèe a ba ce cu

¹⁶ Ŋwè ka' lepshi muunje ce e ku bii mbii, ce e be koo kwàŋ ese mbanrùŋwè ka', noŋ a ye, banɛ e tur à rlà' rkap muunje anà tɛ e ba ŋgwa yì. ¹⁷ Tar muunje ka' kani wàwà enɛ e be fa muu yì nɛ ye ka', banɛ e be là' mbàa ce yi ghɛɛte à rkap ce a ke là' àtu muunje ce e bii mbii.

¹⁸ Wèe fa mà'shi tɛ njeŋwè ce e ce sɛŋ bseŋ cu ntèe ka'.

¹⁹ Ŋwè ka' nòŋ a nyàa banɛ a be yu ŋgàŋ.

²⁰ Ŋwè ka' gee taŋshì nɛ nyù mò' caa efa Yawè, banɛ a be yu ŋgàŋ.

²¹ Ŋwè fa jar nɛ kilò kè nyù' ye ka', njobè' wèe à m ba bkilò à ŋgõŋ Ijip foŋ.

²² Ŋwè fa jar nɛ ŋgwanrkùŋwè kè jar nɛ muu ŋku ka'. ²³ Wèe ka' jar nɛ wowèe, a war nɛ mè, banɛ nɛ mini-ŋwè, m be yu' lap rwar. ²⁴ La rshentee li be ko' tɛ m yu wèe nɛ kàafà', tɛ wee bbyèŋge a kuti à byepku, tɛ boo wèe a kuti à boo ŋku.

²⁵ Ŋwè ka' foosi mbàa nɛ mò' efa yà bèe ce a yu a wèe mɛ a buu yuu, fa ba àmbò ŋwè nfòosi mbàa ka'. Fa làa enɛ e tee bcùu efa gho ka'. ²⁶ À ka' koo cè' ese ŋwè a wě geŋ à bter, à kusì nɛ ye tɛ nyù ka' coo. ²⁷ Kusì nɛ ye njobè' cè' anà ku ba yi ce e be tɛ'shi yì nyor àgho. À ka' tɛ kusì ka' banɛ e be kèr bòori ba kɛ? E ka' war nɛ mè banɛ m be yu' njobè' mɛ ke koosi

Ŋwà' Rfuu

mnse.

²⁸ Ŋwè fa bepsi Nyù kè cep ŋwè ce e ce sa' yì bèe ka'.

²⁹ Wèe fa goote nè buu ce vi fuu efa m̀̀k̀̀ ker ba efa ye nsuu mr̀̀' à rfa nè mè ka'. Wèe tur à rfa wee boo blee ce boo mmbaŋr̀̀ nè mè. ³⁰ Fa nè ye nà' ba ye njèe wa' foŋ. Mà'shi nè te a cu a wâp ma wèe à mǹ̀ŋ sàambâ, e ba mbe mǹ̀ŋ waami wèe ka' fa nè mè.

³¹ Wèe be ba yà bèe ce a yu brara. Bane wèe fa ye efa nyàa ce nyàa efa r̀̀ŋ à sàsi ka', wèe ma' nè ŋgwe.

¹ “Wèe fa kar nè nsuŋ mnde' ka'. Wèe fa cu' mmo wèe ŋwě mbembep à rtee ŋjinsa' mnàŋ ka'. ² Wèe fa dù àmbùu bée gor ce a ce gèe buu bbelep ka' kè tee ŋjinsa' mbe kôr, tee wèe bée gòr ce a ce jepsi rsa' mini ka', ³ kè so'ni ŋgòŋ nè ŋwè fùp ce a ce sa' mi mnsa' ka'.

⁴ “Wèe ka' ye mbòŋ kè jàaki' yè ŋwè bbàa àmbò e ce dà', wèe koo, du fa nè ye. ⁵ Wèe ka' ye àmbò jàaki' ŋwè ce e bàa wèe à gwè, ntèr yi yi'shì ye, wèe fa kù càa càa ka', wèe tee ja' ye àgho.

⁶ “Wèe fa kani à rsa' mnsa' ŋwè fùp mbe kor kùye'e ka'. ⁷ Wèe fa toshi ŋwè à yuu ce ŋgaŋ à gèe ka' ka'. Wèe fa yu ŋwè ce e tur njo ka' ka', yu ŋwè ce e yu kùye'e ka', njobè' m be buu efa rfa ŋge' nè bée bbelep ka'.

⁸ “Ŋwè fa yuni wèe ka', njobè' yuni yuni e ke fèpsi bée, ker jepsi blàa ese bée ce a yu kùye'e.

⁹ “Wèe fa nyù' kilò ka'. Wee wèe riŋ àmbò yi ke ba à rba a kilò , njobè' wèe à m ku be ba à bkilò à ŋgõŋ Ijip.

Mncir kuu mmbomntaa Nyù ba mnòŋ Mŋka'

¹⁰ “Wèe be fà' buu à mŋkù, kèr kep à bfè' ntuunfu, ¹¹ geewa'a, wèe be kyisi mbe bfè' sàambâ, fà' yuu mbo ka', te ŋgã fùp efa wèe mu a bo koni byee e mboo ye. Mnyàa efa rèŋ vi be vù ye ber ce wowèe a kep vi beti. Wèe be gèe nè wee bce mnsini ker ba nè wee bce olèf wa' foŋ.

¹² “Wèe be fà' me mfà' à mnòŋ ntuunfu, geewa'a, wèe be lùshi mbe mnòŋ sàambâ, te wee mmbòŋ ba wee bjàaki' vi lushî. Yi yu wa'a te boo mmbaŋrù vi ye ŋgã mfà' ce bbyèŋge ker ba bkilò a bo lùshi foŋ.

¹³ “Lòr nè nfè' te wèe bo gèe yuu wèe ce mè làa ene wèe gèe. Wèe fa loo nè mnyù mo' kè mòo ene wèe à yòŋ mlii efa gho ka'.

Ŋwà' Rfuu

Mṅkǎ' bgòrgòr vi btaar ce a be gèe njep fè'

¹⁴ “Wèe be gèe ṅkà' nè mè nfè' taar njep fè'.

¹⁵ “Wèe be gèe/ye Ɖkà' Brěd ce a lè yes njoo ka'. Àmbò mè m làa nà, wèe be ye brěd ce a lè Yes njoo ka' à mnòṅ sàamba mbe nfè' ce mè m lè mbe ṅwεε Abip. Wèe be gèe/ye àmbò mè m làa nè wèe nà njobè' wèe à m fuu e à to' Ijip ba mbe ṅwεε anà.

“Ɖwè fa vù kùntombi nè Mè bo mbòmbo ka'.

¹⁶ “Wèe be gèe/ye Ɖkà' Ɖkep buu ce yu ṅkà' buu entombi ce wèe a kep efa mṅkù.

“Wèe be gèe/ye Ɖkà' Mbaashi buu à mbùu fè' mbe nfè' ce wèe à baashi buu ce wèe à fà' efa mṅkù wεε.

¹⁷ “Wèe mmbaṅrù wεεwε a be vù kùntombi nè Tata Nyù nfè' taar njep fè'.

¹⁸ “Wèe fa fa brěd ce a lè yes njoo ne' mè mbe nfè' ce wèe ce gèe taṅshi nè mè nè nyàa ka'.

“Fa mà'shi mfoo nyàa efa ṅkà' ce wèe à gèe nè mè tε mi cu caar bà' à ṅgàptu' ka'.

¹⁹ “Wèe be vù nè buu enjep nshè ce a vi entombi ce vi bòn se kùntombi nè Yawè ce e yu yè Nyù.

“Ɖwè fa laa nyàa muu mbu ce e bii nyon mmbèe ka'.

Nyù à m kà'ni enε bèe Isrèl a be kè so ṅgõṅ Kenàn

²⁰ “Yê, M be tuusi ncindap ce e be ce dù kùntombi nè wèe ce kè'ni wèe àmbò wèe ce jèr, tε e bo vù nè wèe mbe di' ce Mè kupshi nè wèe. ²¹ Fa nè bfee nè ye, yu'ni nè nè yuu ce e ce làa. Wèe fa tètetu nè ye ka' njobè' e be fòosi wèe yè buu bbebep ka' njobè' a mè ce mè fa ye ṅger.

²² “Wèe ka' yu'ni nè ye, gee yuu wεεwε ce M ce làa, banε M be ba ṅwè bbàa nè ye ṅgãa bbàa, kèr rè bèe ce a ce rè wèe.

²³ “Yà ncindap ka' du kùntombi nè wèe, vu nè wèe mbe ṅgòn bèe Amò

Ŋwà' Rfuu

ba bèe Hit ba bèe Pèrès ker ba bèe Kènàn, ba bèe Hif ker ba bèe Jèbùs banε M be siŋsi wowèe dùdù, ²⁴ Wèe fa gu'shi nè wap mnyù kè fà' nè wowèe kè gèe àmbò wowèe a ce gèe ka'. Wèe ye enε wèe à bepsi wowèe wàwà, a bu'shi ku' wap blur ce vi tæte à bdi' ce wowèe a ke loo nè wap nyù nà à bbεbε' à bbεbε'. ²⁵ Wèe be fà' nè Yawè ce e yu yè Nyù tε E ghoni wee byee ba mi mndip, cà'si byaŋ embe wëe ndùu. ²⁶ Mò' efa wèe be jarse muu kè ba kar à ye ŋòŋ ka'. M be gèe tε wèe cu à ŋòŋ tètè.

²⁷ M be gèe tε bèe ce a ce rè wèe a wεp mè. M be jepsi bèe ce wèe ce dù à rrè wowèe, gèe tε ye ŋǎa bbàa a ye wèe caŋse. ²⁸ M be gèe tε ye ŋǎa bbàa a kaŋni. M be jùu bèe Hif ba bèe Kènàn ker ba bèe Hit e ku wëe ntombi àmbò wèe ce dù. ²⁹ Geewa'a, M be jùu wowèe njep mù fè' e mo'sir ka' fà di' ŋòŋ anà yi noŋ mbòmbo tε mnyàa efa rεŋ vi lo kù' fa wèe ŋge' ka'. ³⁰ M be jùu wowèe mucàr mucàr caar wèe ke kù', koo ŋòŋ anà à ye.

³¹ “M be gèe ye ndèeŋòŋ kε' embe Rdip Rbeer du ba' mbe Rdip rgòr li bèe Fèleshà, ker ba kε' e à nteerεŋ du ba' Rdip Yufretis. M be gèe wa'a njobè' M be fa bèe e à ŋòŋ anà mba wëe bò tε wèe juu wowèe àmbò wèe ce dù. ³² Wèe fa ye lè' wèe wowèe ba wap mnyù ka'. ³³ Wowèe a be cu à ye ŋòŋ ka', fà di' wowèe a gee tε wèe gee yuu bebep nè mè ka'. Wèe ka' gu'shi nè wap mnyù, banε yi be ba à taa nè wèe.”